

眉州屬志卷七

兵防志

防汛

民兵

寇警

古者井田之制有稅有賦稅以足食賦以足兵故其時耰鋤之民皆擊刺之旅也後世以民養兵以兵衛民有事則招集事畢則散遣亦費簡而民不勞眉郡爲蜀省西南水陸之衝唐宋時皆置防禦使以重兵守之我

朝勘定西蜀寇盜削平以眉近成都駐防兵衛亦量加裁減以紓民力惟汛弁領營兵數十名而已百

眉州屬志

卷七

防汛

一

數十年來民安樂利雞犬無驚蓋太平之化洽久矣祭公謂王者耀德不觀兵而洪範之陳師獨居終良有以也然蜀介巖疆黎雅以南獠猺出入之區卽內地亦不可無備昔宋太祖設義軍令州縣籍稅戶充壯丁明代衛所而外詔簡武勇立爲民兵文職領之

會典載順治四年各省州縣設立民壯以資捍禦夫綢繆桑土思患預防清釐保伍以除奸慝增設壯勇以爲戍守似亦安不忘危之道也作兵防志

防汛

眉州

唐中和元年置保勝軍防禦使治眉州

宋置眉州防禦使

明置駐防千總一員

皇清置右司北總一員本隸阜和協峩邊營額設馬步戰守兵五十名雍正六年復設彭山縣分撥兵二十五名祇存馬兵一名戰兵六名守兵十八名乾隆五十七年改隸提標中營嘉慶二年添設新兵

眉州屬志

卷七

防汛

二

七名共舊額兵三十二名分防桃子菌水塘一處松江鋪虎皮鋪雁磨鋪金牛鋪龍安鋪旱塘五處

丹稜縣

隸阜和協黎雅營置外委把總一員額設戰兵二名守兵七名共戰守兵九名地處偏僻未設塘汛

彭山縣

本隸阜和協峩邊營改隸提標中營置外委把總一員額設戰兵四名守兵二十名嘉慶二年添設新兵七名共舊額兵三十一名分防水塘江口一

處旱塘栢木鋪梓潼鋪龍門鋪三處

青神縣

本隸阜和協峩邊營改隸提標中營置外委把總一員額設戰兵二名守兵七名嘉慶二年添設新兵二名共舊額兵十一名分防白菓渡羅波渡水塘二處

民兵

宋太祖開寶八年設夔州路義軍士兵壯丁州縣籍稅戶充之遇寇遣使徵討官軍但據險策應其

眉州屬志

卷七

民兵

三

校長之名隨州縣補置月給衣糧有功者以次遷宋孝宗淳熙五年刺史胡元質言關外西河階成鳳四州所聚兵謂之忠勇皆士兵爲之向來虞允文團結四川忠勇其後不能增募乞令四川守臣增募仍立賞格

明洪武三年詔四川立民兵萬戶簡民間武勇教之技擊編隊伍時操練

國朝會典載順治四年各省州縣設立民壯五十名因州縣不加操練有名無實雍正二年刑部尙書

勵廷儀奏稱務足原額雍正六年欽奉

上諭文員應給防護之兵以備捍禦之用雍正七年因山東濟寧匪類拒捕奉文設民壯二十名每名歲給工食銀六兩雍正九年總督田文鏡奏分別衝僻量爲裁減嗣奉文減去四名存一十六名每名歲給工食銀八兩乾隆十一年奉文仍照舊額眉州設民壯二十名丹稜彭山青神三縣各設民壯十名

寇警

眉州屬志

卷七

寇警

四

漢建武十一年春岑彭討公孫述多張疑兵使護軍楊翕與臧宮拒延岑等自分兵浮江下還江州泝都江而上襲擊侯丹大破之因晨夜倍道兼行二千餘里徑拔武陽使精騎馳廣都去成都數十里勢若風雨所至皆奔散初述聞漢兵在平曲故遣大兵拒之及彭至武陽繞出延岑軍後蜀地震駭述大驚以杖擊地曰是何神也

後漢書

十一年岑彭自荆門泝江征述破荆門關及沔關徑至彭亡述使刺客刺殺彭由是改彭亡曰平無

言無賊也

華陽國志

漢中平元年涼州黃巾逆賊馬相趙祗等聚衆綿竹殺縣令李升募疲役之民一二日中得數千人遣王饒趙播等進攻雒城殺刺史儉并下蜀郡犍爲旬月之間破壞三郡相自稱天子衆以萬數又別破巴郡殺太守趙韙部州從事賈龍率領家兵在犍爲之青衣率吏民攻相破滅之州界清淨

華陽國志

晉咸寧三年春刺史王濬誅犍爲民陳瑞瑞初以

眉州屬志

卷七

寇警

五

鬼道惑民自稱天師徒衆以千百數濬聞以兵誅瑞及其黨袁旌等焚其傳舍益州民有奉瑞道者見官二千石長吏巴郡太守犍爲唐定等皆免官

華陽國志

晉建元元年蜀獠民從山出自巴至犍爲梓潼布

滿山谷大爲民患境內蕭然

華陽國志

三年春桓溫伐蜀軍至青衣李勢大發兵遣督堅等將之自山陽趨合水諸將欲設伏江南以待晉兵督堅不從引兵自江北鴛鴦碕渡向犍爲溫自

將步卒直指成都咎堅至犍爲乃知與溫異道還
白沙頭津濟比至溫已軍於成都之十里陌堅衆
自潰

華陽國志

晉永和三年溫軍至青衣僞蜀漢李勢遣李福李

權向彭模

蜀鑑

桓溫至彭模議欲分兩軍異道俱進以分漢兵勢
袁喬諫言乃自將步卒直指成都李福進彭模孫
盛等奮擊之溫進遇李權三戰三捷

蜀鑑傳

晉義熙九年六月譙縱遣侯暉譙詵帥衆萬餘屯

眉州屬志

卷七

寇警

六

平模朱齡石帥諸將攻克之

蜀鑑

齡石至平模去成都二百里侯暉譙詵夾岸築城
以扼齡石以天時盛暑欲養銳息兵劉鍾曰賊阻
兵守險者懼不敢戰也盡銳攻之必克齡石從之
諸將以水北城險欲攻南城齡石曰屠南城不足
以破北若拔北城則南城自潰矣秋七月攻北城
克之斬侯暉譙詵

蜀鑑傳

唐貞觀二十二年將征高麗遣使發蜀民造舟役
及山獠於是雅眉邛三州獠叛發隴右峽中兵二

萬餘人以擊之造船之役州縣督迫嚴急民至賣田宅鬻子女不能供穀價踊貴劍外騷然

唐咸通十年十二月南詔陷嘉黎雅等州初南詔遣使來謝釋董成之囚定邊節度使李師望欲激怒南詔以求助遂斬其使師望貪殘士卒怨怒詔以竇滂代之滂貪殘尤甚蠻陷犍爲及嘉州滂自將拒之大渡河蠻乘船楫爭渡諸將勒兵出戰滂單騎宵遁蠻遂陷黎雅詔左神武將軍顏慶復將兵赴援十一年二月南詔進攻成都次眉州節度

使盧耽與前瀘州刺史楊慶復共修守備募驍勇士號曰突將時興元鳳翔援兵已至漢州滂阻之令勿前蠻合梯衝四面攻城城上投火沃油焚之慶復率突將出戰殺蠻二千餘人少却復攻城城中復出兵擊之乃退貶竇滂康州司戶以顏慶復爲東川節度使蠻遣使求和不許蠻復急攻援蜀兵至城下與戰遂夜遁去

唐文德元年十二月陳敬瑄田令孜聞韋昭度將至治兵完城以備之詔割邛蜀黎雅置永平軍以

王建爲節度使削敬瑄官爵龍紀元年感義節度使楊晟爲王行瑜所逐棄興鳳走據文龍成茂四州田令孜使守彭州王建攻之陳敬瑄使眉州刺史山行章將兵五萬壁新繁以救之建大破之晟懼徙屯三交大順元年王建攻邛州陳敬瑄遣大將楊儒將兵三千助刺史毛湘守之儒見建兵盛帥所部出降留判官張縑爲邛南招安使引兵還成都簡資嘉戎四州皆降建九月建復攻邛州急都知兵馬使任可知斬刺史毛湘以降以張縑知

眉州屬志

卷七

寇警

八

留後二年七月建克成都自稱留後

宋淳化四年正月青神民王小波李順聚衆爲亂初蜀亡其府庫之積悉輸汴京後任事者競趨功利於常賦外更置博買務禁商賈不得私市蜀地狹民稠耕稼不足以給由是小民貧困小波因謂衆曰吾疾貧富不均今爲汝均之貧者爭附遂攻青神掠彭山殺縣令剖其腹實之以錢惡其誅求無厭也旁邑嚮應西川都巡檢使張玘與戰於江原江射殺小波而玘亦死之其黨推小波妻弟李

順爲主衆至數十萬攻陷綿漢彭邛進攻成都陷之五年正月命宦者王繼恩爲兩川招討使雷有終爲轉運使討之王果率兵趨劍門尹元率兵由峽路而進二月順分衆數萬寇劍州劍門都監上官正有疲卒數百激以忠義力戰以守會成都監軍宿翰兵至正與之合迎擊賊衆大破之斬馘幾盡餘三百人奔歸成都順怒其驚衆盡斬之時朝廷深以棧道爲憂於是閣道無壅王師得以長驅西進順又攻施州亦爲利兵所敗三月詔凡被脅

從能歸順者並釋其罪四月王師由小劍門路入研石寨破其衆斬首五百級追至綿州順兵望風奔走殺戮及溺死者不可勝計又遣曹習破賊於老溪進復閬巴蓬劍等州五月破賊十萬衆斬首三萬級獲李順復成都生擒僞樞密使并甲鎧僭僞服用甚衆其黨復攻陷嘉戎等八州繼恩等頓師不進專務飲博其下恣橫剽掠餘勢復張八月張詠知益州遣正翰楊瓊衛紹欽等分出且舉酒囑軍校曰爾等荷國厚恩此行當平蕩醜類若老

師曠曰此地還爲爾死所矣由是正等決行深入
大致克捷時民多脅從詠諭以恩信使各歸田里
明年正月帝下詔罪己曰朕委任非當燭理不明
致親民之官不以惠和爲政管權之吏惟用刻削
爲功撓我蒸民起爲狂寇念茲失德是務責躬永
鑒前非庶無貳過聞者咸悅二月餘攻眉州翰擊
敗獲之餘黨悉平

順治元年八月初九日流賊張獻忠陷成都分陷
各州縣十月賊將狄三品陷眉州二年七月賊將

劉文秀陷丹稜踞其署驅城中民於西門外濟橋
殺之屍與橋平又遣兵搜山以繩絡男婦擁至江
陵廟殲焉剗北山爲教場操兵三月而去時邑人
彭萬崑謀拒賊爲持牛酒偵賊營聚勇壯守險阨
賊入鄉輒殺之有打糧賊三百突至設伏誅於三
溪口賊不敢近一鄉獲全三年正月初五日屠眉
州先期狄三品傳令除城盡勦民不悟以爲入城
可免老幼盡避城中是日驅城中人集道姑巷田
壩上悉屠之州民陳登皞混名鐵脚板憤賊殘酷

裂衣爲旗招集四鄉遺民得數千樹柵醴泉河上
賊攻之登皞率衆白梃鋤耰殺賊三百賊懼從間
道潛移東館登皞復遣壯士持酒米雞豚迎於道
賊納之營中夜半襲營壯士從中鼓噪殺出賊大
駭競奔復斬首數百賊遁去登皞自以鉄勝名營
遠近悉歸之二年中無一騎犯境者後嘉定向成
功率衆欲節轄登皞登皞不從成功圍之登皞力
戰死成功遂踞其地三月明叅將楊展恢復嘉定
獻忠遣劉文秀狄三品來攻敗去展盡復眉邛雅

諸州邑獻賊殺川民已盡率兵十數萬裝金寶數
千艘順流東下欲乘勢走楚楊展逆於彭山之江
口縱火大戰燒沉其舟賊奔北士卒輜重喪亡幾
盡復還成都展取所遺金寶以益軍儲自是富甲
諸將獻賊走川北展追賊於漢州不及而還冬十
二月

王師誅獻忠於鳳皇山五年故賊將袁韜武大定歸楊
展展愛其材武厚待之令韜屯犍爲大定屯青神
六年袁武刺殺楊展初明故巡撫李乾德怨展遇

已疎畧陰勸袁武圖展會展壽置酒犍爲邀展展
醉刺殺之遂圍嘉定三月城陷展子璟新出奔袁
武悉併其資與衆獻賊誅後賊將孫可望劉文秀
等竄入雲南聞展死使王自竒向川南劉文秀白
文選等取遵義於是全川復陷於賊八年文秀攻
嘉定袁武敗降於賊九年

大兵至眉州向成功據守石佛棧大兵攻破其柵成功
中流矢死三月南征下嘉定十年大破劉文秀等
於保寧繼下重慶叙州馬湖等屬康熙元年壬寅
眉州屬志

卷七 寇警

十二

冬十二月總督李國英統秦豫廣三省會四川進
勦餘孽俱盡全蜀收入版圖招來安集始獲享昇
平之福矣